

PASCHE FLORIDE - PENTECOSTIS

Antifone di jentrade Sap 1,7

Il spirt dal Signôr al jemple il mont intîr,
e chel che al ten adun ognî robe al cognòs la vôs di dut, aleluia.

Si dîs Glorie a Diu.

Colete

Diu, che cul misteri de fieste di vuê
tu fasis sante dute la tô Glesie
in ogni popul e gjernazie,
spant i regâi dal Spirtu Sant par tant largje che e je la tiere,
e ce che la tô gracie si è indegnade di operâ
propit al inizi de predicazion dal Vanzeli,
fasilu ancje cumò tai cûrs di chei che a crodin.
Pal nestri Signôr Jesù Crist to Fi, che al è Diu
e cun te al vîf e al regne dutune cul Spirtu Sant,
par ducj i secui dai secui.

PRIME LETURE At 2,1-11

A restarin ducj incolmâts di Spirtu Sant e a tacarin a fevelâ.

Dai Ats dai Apuestui

Rivade la dì des Pentecostis, a jerin ducj insieme intal stes lûc cuant che a bot al rivà dal cîl un sunsûr come di un aiaron, che al jemplà dute la cjase là che a jerin a stâ. Ur comparirin come tantis lengthis di fûc, che si spartirin e a lerin a poiâsi sul cjâf di ognidun di lôr. A restarin ducj incolmâts di Spirtu Sant e a tacarin a fevelâ lengthis forestis, daûr che il Spirtu Sant ju sburtave a fevelâ.

A jerin a Jerusalem int di religion di ogni gjernazie che e esist sot dal cîl. Sintût dut chel sunsûr, si ingrumà une trope di int che e restâ scaturide a sintîju a fevelâ ognidun te sô marilenghe. A jerin sconsortâts e si disevin fûr di sè: «Chei che a fevelin, no sono ducj Galileus? Cemût ise alore che ognidun di nô ju sintìn a fevelâ te nestre marilenghe? Parts, Medians, Elamits, int de Mesopotamie, de Judee e de Capadocie, dal Pont e da l'Asie, de Frigje e de Panfilie, dal Egjit e di chê part de Libie des bandis di Cirene, e Romans riplantâts, Judeus e convertîts, Cretês e Arabics, ju sintìn a contâ te nestre lenghe lis bielis voris di Diu!».

Peraule di Diu.

SALM RESPONSORIÂL dal Salm 103

R. Dal to Spirt, Signôr, e je incolme la tiere.

O ben:

R. Aleluia, aleluia, aleluia.

Benedîs, anime mê, il Signôr,

tu sêts propit grant, Signôr, gno Diu!

Cetantis robis che tu âs fatis, Signôr!

La tiere e je plene incolme des tôs creaturis. **R.**

Tu ur gjavis la soflade e lôr a muerin,
e tal lôr pulvin a tornin.

Tu mandis la tō soflade e lōr a vivin,
e cussì tu fasis gnove cree la face de tierie. **R.**

La glorie dal Signôr che e duri par simpri;
che si indalegri il Signôr par dutis lis sôs voris.
Che al vedi agrât la mē cjante;
tal Signôr e sarà la mē gjonde. **R.**

SECONDE LETURE Rm 8,8-17

Ducj chei che si fasin guidâ dal Spirt di Diu, chei li a son fîs di Diu.

De letare di san Pauli apuestul ai Romans
Fradis, chei che a son te cjar no puedin plasêi a Diu.

Vualtris però no sês sot de paronance de cjar ma dal Spirt, dal moment che il Spirt di Diu al è a stâ in vualtris. Se un nol à il Spirt di Crist, nol è dai siei. Ma se Crist al è in vualtris, il cuarp al è muart par colpe dal pecjât, ma il Spirt al è vite par vie de justificazion. Alore se il Spirt di chel che al à risussitât Jesù dai muarts al è a stâ in vualtris, chel che al à risussitât Jesù Crist de muart ur darà la vite ancje ai vuestris cuarps destinâts a la muart e lu fasarà in fuarce dal Spirt che al è a stâ in vualtris.

Scheduncje, fradis, no sin in debit cu la cjar, in mût di vivi seont la cjar. Di fat se o vivarêts seont la cjar o murirêts. Se invezit cul Spirt o copais lis oparis dal cuarp, o vivarêts.

Ducj chei che si fasin guidâ dal Spirt di Diu, chei li a son fîs di Diu. Di fat no vêts cjapât un spirt di sotanance, in mût di scugnî tornâ a vivi inte pôre, ma o vêts cjapât il spirt di fîs di anime e midiant di lui o berlìn: "Abà, Pari!". Ancje il Spirt al testemonee al nestri spirt che nô o sin fîs di Diu. Se o sin fîs, o sin ancje erêts, erêts di Diu, coerêts cun Crist, dal moment che, se o patîn cun lui, al è par che o podîn jessi glorificâts insieme cun lui.

Peraule di Diu.

SECUENCE

Veni, Sancte Spíritus
et emítte cælitus
lucis tuæ rádium.

Veni, pater páuperum,
veni, dator múnnerum,
veni, lumen córdium.

Consolátor óptime,
dulcis hospes ánimæ,
dulce refrigérium.

In labóre réquies,
in æstu tempéries,
in fletu solácium.

O lux beatíssima,
reple cordis íntima
tuórum fidélium.

Sine tuo númine,
nihil est in hómine,
nihil est innóxium.

Lava quod est sórdidum,

riga quod est áridum,
sana quod est sáucium.

Flecte quod est rígidum,
fove quod est frigidum,
rege quod est dévium.

Da tuis fidélibus,
in te confidéntibus,
sacrum septenárium.

Da virtútis méritum,
da salútis éxitum,
da perénne gáudium.

Ven a fânuis visite,
Spirtu Sant e mandinus
i tiei rais di gracie.

Pari de int puare,
di regâi tu jemplinus,
e tal cûr lumininus.

Ven mo, tu consolinus,
ven mo, tu solevinus,
dolç amì da l'anime.

Te fadie, recuie,
polse te flaperie,
gjonde in ogni strussie.

O lûs sante, limpide:
ven, il cûr travaninus,
di sapience mistiche.

Cence la tô gracie,
l'om al reste vitime
de sô gran miserie.

S'o sin sporcs, tu netinus,
tu la sêt distudinus
e dai mâi vuarissinus.

S'o sin frêts, tu scjaldinus,
s'o sin dûrs, morestinus,
se straviâts, indrecinus.

Puarte in ogni anime
che fidant ti supliche
i siet dons di gracie.

Il ben fat rimertinus,
a bon fin compagninus,
te tô glorie meninus.

O ben:
SANCTI SPIRITUS

Che e sedi cun nô la gracie dal Spirtu Sant
e e fasi deventâ i nestris cûrs la sô cjase,
dopo di vê parât fûr di li ducj i vizis da l'anime.

Spirt, che tu ur dâs vite e lûs ai oms,
nete vie il scûr trement de nestre anime.
Tu che tu i tegnis ai pinsîrs simpri bogns,
jemple par plasê i nestris sens cu la tô unzion.

Tu che tu purifichis dutis lis sporcjetâts dal spirit
purifiche il voli dal nestri om interiôr
par che o podin viodi il Pari di ducj,
chel che a puedin viodilu dome i monts tal cûr.

Tu tu âs ispirât i profetis par che a podessin
prenunziâ lis grandis laudis di Crist.
Tu tu âs confuartât i apuestui par che a puartassin
in dut il mont la vitorie di Crist.

Stant che Diu al à fat l'implant dal cîl,
de tiere e dai mârs cu la sô peraule,
tu, Spirt, tu âs slargjade la tô potence
parsore des aghis.

Tu tu fecondis lis aghis par vivificâ lis animis.
Tu, cu la tô ispirazion, tu ur dâs ai oms di jessi spirtuâi.
Tu, Signôr, tu âs dât dongje un mont che al jere
dividût par lengthis e par costumancis.
Tu, mestri dai mestris, tu tiris dongje
i idolatris al cult di Diu.

Par chel, degniti di scoltânus nô che ti suplichìn,
o Spirtu Sant,
che cence di te dutis lis preieris si à di ritignîlis
vueidis e indegnis des orelis di Diu.

Tu che tu âs inscuelât i sants di ducj i secui
che si son lassâts sburtâ de tô potence,
ancje vuê tu ur regalis ai apuestui di Crist
un ben straordenari e che no si à mai sintût tal mont.

Tu tu âs colmade di glorie cheste zornade.
Che e sedi cun nô la gracie dal Spirtu Sant.

CJANT AL VANZELI

R. Aleluia, aleluia.

Ven, Spirtu Sant, jemple i cûrs dai tiei fedêi
e impie in lôr il fûc dal to bonvolê.

R. Aleluia.

VANZELI Zn 14,15-16.23-26

Come che il Pari mi à mandât me, cussì jo us mandi vualtris: cjapait il Spirtu Sant.

Dal vanzeli seont Zuan

In chê volte, Jesù al disè ai siei dissepui: «Se mi volês ben, o metarêis in pratiche i miei comandaments. E jo o prearai il Pari e lui us darà un altri Confuartadôr, di mût che al sedi simpri cun vualtris.

Se un mi vûl ben, al metarà in pratiche la mê peraule, e gno Pari i volarà ben e o vignarìn di lui e o starìn li di lui. Chel che no mi vûl ben, nol met in pratiche lis mês peraulis. E la peraule che vualtris o scoltais no je mê ma dal Pari che mi à mandât.

Us ài ditis chestis robis biel che o soi ancjemò cun vualtris. Ma il Confuartadôr, il Spirtu Sant che il Pari al mandarà tal gno non, lui us insegnarà dut e us fasarà vignî tal cjâf dut ce che us ài dit».

Peraule dal Signôr.

Si dîs O crôt.

Su lis ufiertis

Signôr, danus par plasê la gracie
che, daûr de promesse di to Fi,
il Spirtu Sant nus palesi plui a font
il misteri di chest sacrifici
e nus meni a la veretât dute interie.
Par Crist nestri Signôr.

Antifone a la comunioñ At 2,4.11

A restarin ducj incolmâts di Spirtu Sant
e a contavin lis bielis voris di Diu, aleluia.

Daspò de comunioñ

Diu, che tu i proferissis a la tô Glesie i regâi dal cîl,
ten cont la gracie che tu âs dade,
par che il regâl dal Spirtu Sant al operi in nô cun fuarce
e la mangiative spirituâl nus fasi cressi pe redenzie eterne.
Par Crist nestri Signôr.